

四庫全書

史部

欽定四庫全書

隆平集卷八

宋 曾鞏 撰

叅知政事

范仲淹字希文唐相復冰之後其先邠州人後徙居蘄州
祖贊任錢氏為秘書監仲淹二歲喪父而母改適長山朱
氏故從繼父姓大中祥符八年登進士第曰朱說後喪母
服除始復其姓而改今名初以憂去官晏殊知應天府表

章府學上書執政萬餘言皆時之先務及終喪殊又薦之除秘閣校理明道初召為右司諫累擢天章閣待制落職知饒州元昊叛復待制知永興軍夏竦為陝西招討使進仲淹龍圖閣直學士以副之改知延州降官知耀州職如故徙慶州復舊官為環慶路經畧安撫沿邊招討使時始分陝西為四路也慶歷二年除幽州觀察使辭不拜遷樞密直學士為陝西路招討使三年樞密副使是秋改叅知政事四年出為陝西河東宣撫使五年罷為資政殿學士知邠州以疾請知鄧州

加給事中知杭州遷禮部侍郎祀明堂恩進戶部徙青州疾甚請潁州未至卒年六十四贈兵部尚書謚文正子純佑純仁純禮純粹御篆其神道碑額曰褒賢所著丹陽集二十卷奏議十七卷仲淹事母至孝以母在時家甚貧及既貴非賓客不食肉妻孥膳服僅足而已姑蘇之范皆疎屬而置義莊以賙給之天下想聞其風采賢士大夫以不獲登其門為耻下至里巷遠及夷狄皆知其名字衆莫知其所以然也初章獻太后欲以冬至

御會慶殿太常具儀請天子率百官獻壽仲淹在祕閣
上疏言王者奉親於內則有家人禮若稱觴殿下是以
天子北面行人臣事抑尊損威不可為後世法不報又
請太后復辟遂出通判河中府又章獻太后遺詔以太
妃楊氏為皇太后叅決軍國事仲淹上疏言太后母之
名號也未聞因保育而代立者今一太后崩又立一太
后天下疑陛下不可一日無母后之助也太妃雖受太
后冊遂不復同聽政郭皇后廢上書諫不報與御史中

丞孔道輔合諫官御史伏闕諫遣中貴人諭令詣中書
宰相曰漢唐廢后久矣仲淹曰何為援前世衰政以累聖
朝明日將畱百官班揖宰相廷爭至待漏院有詔出知
睦州即日就道明道末言事者多摘太后時事以暴於
朝仲淹諫曰太后受遺詔保佑聖躬者十年宜掩其小
故以全大德上感悟始抑言者歲饑出使江淮體量安
撫所至除淫祀賑乏絕民有食烏昧草者擷草以進示
六宮貴戚戒其侈心因陳八事以諫其一曰祖宗時江

淮饋運至少而養六軍取天下今東南歲漕米六百餘萬石府庫財帛又皆出於民而饑年艱食如此願下裁造務後苑作文思院糧料院取祖宗歲用之數則奢儉可見矣其二曰國家太平垂三十年暴斂未除濫賞未革近年赦宥既頻賞給復厚聚於艱難散於容易國無遠備非社稷之福也願無數赦推賞且祖宗欲復幽薊故謹內藏庶行師之時不擾於下其三曰江淮諸路歲已餽糧於租稅之外復又入糴兩浙七十萬以諸路計

之不下二三百萬雖豐年穀價亦高官以傷財民且乏
食今宜銷冗兵削冗吏禁游惰省工作既損京師用度
然後減江淮饋運以租稅上供外可罷高價入糴則歲
省數百萬緡錢或上京師實府庫或以給還商旅商人
既通則推債務入便漸廣而入中之法可以兼行矣其
四曰國家重兵悉在京師仰給度支則所養之兵不得
不精也一卒之費歲不下百千卒萬人則百萬緡矣至
七十歲放停是未停之前大蠹國用及其羸老歸復何

託咸平中揀鄉兵人無歸望號怨之聲動於四野大中祥符間選冗兵無歸之人大至失所此近事之鑒也請下殿前馬軍司禁軍選不堪披帶者別立本鄉州軍就糧指揮至彼有田園骨肉者許之歸則不至失所矣其五曰緣邊市馬歲費不貲罷之則絕戎人行之則困中國自古騎兵未必為利開元天寶間牧馬數十萬匹祿山為亂王師敗績於函谷曾何救焉然西北戎馬不可牧既至京師宜多鬻於民間或有邊用一呼可集重

稅以禁江淮小馬使不至近里州軍則西北之馬可行
外慰戎心內減芻秣以億萬計其六曰發運司歲漕六
百餘綱省員殿侍以歲勞改班行若綱運可減則歲改
職者止賞以緡錢諸州都知兵馬使滿歲如實廉幹湏
知州通判同罪保舉方與班行武臣薦子弟竝令引見
試驗若無所取及年幼者止與奉職至殿侍而已其七
曰百司流外日以增冗請罷招置三五年可去其半舊
二百人者以百人為額餘並移補諸司其八曰真州建

長蘆寺役兵糧已四萬斛棟宇塑像金碧之資又三十萬緡施之於民可以寬重斂施之於士可以增厚祿施之於兵可以拓舊疆矣上嘉納之及在從班言事益無避因言古之治亂繇用人得失此宰相之職也獻百官圖指其遷轉次序遲速曰如此可以為法陛下不可不察又獻四論一曰帝王好尚二曰選賢任能三曰近名四曰推變其大指言治亂繫所任區別而進退左右人主之權也不可以委臣下上因而質於宰相呂夷簡夷

簡以為仲淹離間君臣至交論上前出知饒州殿中侍
御史韓瀆希旨請榜仲淹朋黨於朝祕書丞余靖上疏
言仲淹嘗言陛下母子夫婦之間尚加優容今以一言
觸大臣遽至黜逐非朝廷福太子中允館閣校勘尹洙
自幼與仲淹善兼師友且嘗被論薦請從降黜館閣校
勘歐陽修移書左司諫高若訥責其依違若訥纒奏之
靖等悉貶其後延州諸寨失守東西四百里無藩籬人
心危恐知州張友辭不知兵且老乃以仲淹代之析州

兵馬為六將將三千人隨部分教之使更禦賊朝廷推其法諸路又築青澗城以阨寇衝復屬羌數千落墾田二千頃許互市通有無又建康定軍積蒲充民租春則徙兵就糧減饋運之費三之一時議諸路討賊獨仲淹固守廊延不從及元昊偽請和仲淹答書令去僭號元昊復有書不遜仲淹焚其書不以聞執政以為不當輒通書而又擅焚之叅知政事宋庠請論以軍法上不從降員外郎知耀州職如故未逾月徙慶州而復其官州

之西北有寨據後橋川南通鳳州華州池北扼白豹金湯種落彊悍而善耕久不能城仲淹一日擁兵城之賊騎三萬薄關城下佯北仲淹戒諸將持重勿過河既而果設伏河外城成詔賜名曰大順城環州屬羌明珠滅臧二族各萬餘人皆附賊仲淹又請復細腰城胡蘆泉諸寨招致二族以扼賊又復近羌千三百餘帳葛懷敏之敗關中民皆竄匿山谷乃率部下兵赴援而募兵關下人心始安仁宗初按圖示左右曰若得仲淹出援涇

原可勿憂矣或以為恐道遠不能至後數日上出其章
謂宰相曰仲淹果出援如所料在政府欲倣周官以六
卿事分委輔臣而自領兵刑之任上方銳意政事數於
天章閣詢執政世務仲淹言天下之治莫若守宰得人
欲得人先擇轉運按察使又云取士不可以不根行實
而先詞華圭田不均則不足以養廉吏農桑不課則民
失業詔令屢更則下不信又請復府兵以宿衛京師併
縣邑以寬徭役又欲減五品以上任子例明年與韓琦

列上禦邊四策既欲改制故忌之者衆而僥倖者不便
因出宣撫遂罷政事焉王倫之叛州縣官吏有不能守
者朝廷議欲盡誅之仲淹曰平時諱言武備盜賊之至
責守臣死事不可故守令皆得不誅仲淹所至恩威竝
行鄧慶之民并西陲屬羌皆繪像生祠之其卒也上尤
嗟嘆焉

丁度字公雅開封人力學有守大中祥符四年登服勤
詞學科累擢知制誥翰林學士兼侍讀加承旨任翰林

凡七年仁宗問用人以才與資孰先對曰承平時宜用才諫官孫甫乃言度請間自求柄用上諭輔臣曰度侍從十五年數論天下事未嘗及其私甫何從得此遂除工部侍郎樞密副使時慶歷五年明年改叅知政事八年罷為紫宸殿學士翰林侍讀學士進觀文殿學士積官至尚書右丞卒年六十四贈吏部尚書謚文簡子諷諫舊制監司及藩鎮辭見皆賜對仁宗初即位止令附奏度言附奏非所以防壅蔽也又作王鳳論諷章獻太

后以檢外戚天聖間太史上言永昌陵有白氣當徙陵以厭之度奏神道貴靜陵寢大事不可用術者言輕議改易事乃止康定初劉平石元孫戰陷上問禦邊計度奏中國宜以智勝難以力克今莫若謹亭障遠斥堠控扼要害條上十策名曰備邊要覽方西事未寧知樞密院宋綬私忌不給假度請無以邊事責成大臣給休假如故無使外夷窺朝廷深淺上從之度為羣牧使上言天聖中牧馬至十餘萬其後言者以天下無事遂廢八

監陝西河東歲市二萬二百纔能補京畿塞下之闕自
用兵數年所市馬比常歲特三之一請下令河東京東
京西淮南籍丁壯為兵處有能畜一戰馬者與免二丁
仍不升戶等以備緩急如此則國馬蕃矣度在經筵上
每呼學士而不名嘗問著龜占應事對曰不若以古之
治亂為著龜也上出敬器以示之曰朕欲臨天下以中
正對曰臣等亦願以中正事陛下因奏太宗時嘗作此
器真宗為之贊上遂製敬器論賜之度性純淡不事威

儀左右無姬侍喜論時事在政府召諸子謂曰王旦為宰相十二年卒之日其子猶有為布衣者自今吾不復有請矣爾曹宜自勉嘗作慎言賦書紳銘以戒諸子又著邇英聖覽十卷龜鑑精義十二卷慶厯兵錄五卷贍邊錄一卷編年總錄八卷管子略要五篇

吳育字春卿建州人天聖五年登進士甲科又舉賢良方正八等屢厯外官始擢知制誥翰林學士慶厯五年除樞密副使是年叅知政事六年復樞密副使七年罷

知許州徙蔡州加資政殿學士知河南府徙陝州永興
軍丁父憂服除召兼翰林侍讀學士以疾辭改知汝州
又辭以集賢院學士判西京留司御史臺皇祐五年加
資政殿大學士判西京提舉醴泉觀判都省除宣徽南
院使判延州疾復作請便郡知河中府徙河南府卒於
資政殿大學士尚書右丞年五十五贈吏部尚書謚正
肅子安度安矩安素安正安本安序安厚安憲安節有
文集五十卷育常知汝州襄城縣宗室多葬襄城以中

貴人典護民患其擾育請所須當從官給非特省費民甚便之知太常禮院言禮文殘缺願詔諸儒裁定乃詔修禮書故事尚書省集議在朝則先職入省則先官官卑而職高者嘗托事不至景佑中遂罷兩制清望有議而不集非所以慎重求至當之意乃請使異席不相壓則適中矣衆議是之元昊僭稱帝還所授旌節議者皆謂發兵坑小醜爾育獨曰元昊名為臣其寸土尺賦不入縣官窮漠之外陰僭輿服久矣儻稍易其名猶足順撫

而收之奏不報而後卒用其議章懿太后升祔真宗廟
言者請覃恩給賞育力諫止既而上語輔臣曰外甚怒
執政宜慎之育對曰臣既以身許國何避耶山東盜起
上遣中使察視還言盜不足慮也兗州杜衍鄆州富弼
山東人甚尊愛之臣以為憂上欲徙二人育在政府曰
盜誠無足慮者小人乘間以傾大臣非國家之福議遂
寢育知蔡州以伍保法檢制盜賊京師喧傳妖人數十
在蔡州詔遣中使以名捕者十人使至請以巡檢兵趨

搜山索之育曰必欲得妖人還報耶請留此勿往使者
以為然頃之召十人者皆至械送闕下皆以無罪釋告
者遂抵法留司御史臺舊不領民事育在西京河陽人
民以張堯佐裁決稽積多詣育育判於紙尾堯佐畏恐
即奉行焉夏人既納款而竝邊種落數侵為患龐籍守
并州欲築堡備之育判延安因謂要契未明亟城則爭
而受患者麟府也乃移文河東又與籍書及疏於朝不
報未幾河外殺驍將郭恩而太原將佐皆以罪去育立

朝敢言始自樞密副使改叅知政事數與宰相賈昌朝
議事上前爭辨不已遂復還樞府明年大旱御史中丞
高若訥以大臣廷爭為不肅故雨不時若因而罷之育
初加大資政召還上數欲復大用而諫官劉元瑜譖之
故有延安之命晚年喜作詩在西臺與舊相宋庠追裴
白故事酬唱至數百篇育性識明達所至條教簡而易
行辨論古今明白利害使聽之者曉然不疑

程琳字天球永寧軍人也大中祥符四年舉服勤詞學

科中選授泰寧軍節度推官天禧中召試除直集賢院
累擢知制誥權御史中丞樞密直學士龍閣閣學士正
除御史中丞不拜以翰林侍讀學士知開封府改三司
使景祐四年叅知政事寶元二年鄭戩知開封府發琳
使府吏馮士元抑孀婦市第及買女口責光祿卿知潁
州久之復戶部侍郎知青州又復吏部知天雄軍又復
尚書左丞為資政殿學士及建天雄軍為北京內侍皇
甫繼明典營造宮室欲侈大而琳以為方事備邊又困

民以土木不可數有論奏上遣御史魚周詢按視遂罷
繼明獨命琳遷工部尚書加大學士河北路安撫使慶
曆六年建節知永興軍陝西安撫使皇祐元年拜使相
判大名府以武昌節制換武勝又換鎮安之本鎮卒年
六十九贈中書令謚文簡子嗣隆嗣弼嗣先天聖五年
琳館伴契丹使蕭蘊杜防蘊出坐圖謂琳曰中國使至
契丹坐位高契丹使至中國坐位下請升之琳曰此真
宗皇帝所定不可更也防又曰大國之卿可乎琳曰南

北兩朝安有大小防不能對上令與宰相議或曰此特
細事爾將許之琳曰更欲大者奈何遂止琳知益州上
元張燈先戒火備曰有火即救之勿以白果有火終燕
人無知者有告振武軍變者監軍以白琳曰軍中動息
我自知之苟有謀不待告者來卒不至蜀人歲為社會
以祀灌口琳曰往時不誅李順故大亂乃捕為首者戮
之餘百數配內地或以冤聞上遣使視蜀無事得解在
三司或請募商人輸粟京師罷江淮漕運琳曰猾商要

價而粟不至奈何又有請并稅名目琳曰使牛皮食鹽之類合為一穀粟黍豆合為一易於句按可也後世有興利之臣復以舊名增之是重困民無已時也在政府有議重賄喃廝囉使討賊因以其地與之琳曰使喃氏得地是又有一元昊也不若用間使二羌勢離則中國之利矣知永興元昊死諒祚立尚幼以三大將分治其國或謂因各授三將節度使以分弱其勢琳曰幸人之喪非所以示夷狄不如因而撫之議者以為失機會初

元昊雖叛猶遣使入朝朝議欲誅其使琳曰古者交兵
使在其間宜善遣之以示大體其後使者益驕大臣皆
咎琳琳曰始不誅以罪有在也今既驕暴其罪誅之以明國
法又何患耶琳持重不撓守魏凡十年魏人愛之為立生祠
章獻太后時嘗上武后臨朝圖其為人嚴深長於政事平
時議論不少下人至朋僚故舊飲酒笑歌不復有勢位
之間世或以嗇於財而厚自奉為誚

明鎬字化基密州人大中祥符五年登進士第屢從薛

奎辟奎大用盛稱鎬有廊廟才累擢至天章閣待制龍
圖閣直學士樞密直學士自成德軍入知開封府會盜
據甘陵為體量安撫使及文彥博宣撫河北以鎬副之
賊平進端明殿學士給事中彥博數推功於鎬擢三司
使慶歷八年參知政事未幾發疽薨於位年六十贈禮
部尚書謚文烈仁宗初聞其疾亟謂輔臣曰鎬忠亮有
勞欲及其未亂一召見之既至惻然謂曰方賴卿謀國
事遽有此疾鎬已氣索猶能頓首稱謝翌日遂逝鎬端

重寡言所至安靜有體臨事不苟為陝西轉運使閱同州廂軍得材武者三百人教以彊弩奏為清邊軍最驍悍其後陝西河東悉置此軍

王堯臣字伯庸應天府人天聖五年登進士第累擢知制誥翰林學士權三司使兼端明殿大學士加承旨羣牧使皇祐三年樞密副使嘉祐元年叅知政事上欲除樞密使為掌制學士胡宿所抑止進吏部侍郎薨於位年五十六贈左僕射謚文安子同老明老堯臣為右司

諫郭皇后廢且死中外以為宦官閹文應進毒堯臣請
先治其左右侍醫者不報后在殯上元節有司俟乘輿
觀燒燈堯臣言后已復位號則不當遊幸上為輟張燈
一夕在三司時入內都知張永和建議欲收民錢十三
萬以助軍費堯臣言於上曰此唐德宗所以致朱泚之亂
也夔州路轉運使請增鹽井歲課十餘萬緡事下三司堯
臣以為上恩未嘗及遠人而反浚取厚利適以斂怨也
皆罷之康定初為陝西體量安撫使上言故事使者所

至輒稱詔存問官吏將校而不及民自元昊反三年於
今關中之民不勝彫斲宜有以勞徠之上從其請降敕
俟賊平蠲其租賦二年又言陝西二十萬兵分屯四路
不足以自守涇原最為要害處請萬人以屯渭州以制
山外如此賊不敢輕出犯塞也好水川失利韓琦降知
秦州范仲淹以擅答元昊書降知耀州堯臣言二人皆
忠義可任不當置之散地又薦种世衡狄青有將帥才
明年葛懷敏敗邠涇以東皆閉壘自守仲淹自將慶州

兵捍賊始引去上思其言乃復命安撫陝西而以琦仲
淹為招討置府涇州益屯兵三萬人堯臣行邊至得勝
寨適弓箭手閉城亂堯臣作書諭以禍福射入城中悉
出降又請罷涇原五州營田益募弓箭手於德順軍又
請廢潼關在樞府二年務裁抑僥倖至有鏤匿名書傳
之京城者上信之益不疑乃擢叅知政事堯臣典內外
制十餘年文詞溫潤得王言體有文集五十卷垂絕遺
奏勸上蚤擇宗室之賢者為皇嗣云

程戡字勝之許州人天禧三年登進士甲科累擢天章閣待制樞密直學士進端明殿學士知成都府召見許以還為執政明年遂召為參知政事時至和元年也嘉祐元年以文彥博親嫌改樞密副使五年罷為宣徽北院使判延州英宗即位加節度使再任以年過七十告老十數奏不許復以疾告許還至同州卒年七十七謚康穆戡嘗知瀛州契丹使過稱疾求小幘相見戡曰疾可無相見相見則宜如禮在延州橫山酋豪請以兵乘

塞而自以其屬取靈夏歸中國戡奏言諒祚數悖慢而多殺戮人人離心今其酋豪如此可許之時英宗不豫大臣重生事不從戡久分帥閫號習邊事世多誚其折節交宦者

孫抃字夢得眉州人六世祖長孺喜藏書為樓而置其上蜀人號為書樓孫家天聖六年登進士甲科累擢知制誥翰林學士皇祐中權御史中丞制下諫官奏抃非糾繩才抃手疏言方今士人趨進者多廉退者少以善

求事為精神以能訐人為風采捷給若嗇夫謂之有議
論刻深若酷吏謂之有政事諫官所謂才者無乃在是
乎若然臣誠不能也仁宗察其言趣視事其後仁宗欲
用耆舊故擢朴叅知政事樞密副使朴年雖未高而浸
益昏忘語言舉止人以為笑御史韓縝彈奏遂罷政事
以太子少傅致事卒年六十九謚文懿朴為中執法數
言事內臣王守忠特恩遙領節度朴奏罷之張貴妃薨
追冊為后且有建陵立廟之議朴固爭不從因伏不起

上改容遣之陳執中筆婢出外舍死或曰嬖張殺之事
聞命近侍制獄取證左執中弗遣有詔勿推扑奏疏十
上竟緣是罷相扑前後多稱薦士大夫居侍從雖久而
恬於進取人以為長者



隆平集卷八

欽定四庫全書

史部
隆平集卷九至
十三

詳校官編修臣李潢

編修臣袁謙履勛

總校官檢討臣何思鈞

校對官學正臣翁樹棠

謄錄監生臣葛溥

欽定四庫全書

陸平集卷九

宋 曾鞏 撰

樞密

吳廷祚字慶之太原人在周為樞密使宋興加中書門
下三品以父名璋故也建隆初為雄武軍節度使改京
兆尹卒贈侍中子元輔元載元展太祖征李筠嘗詢廷
祚以為筠無謀恃勇離巢穴出戰則擒之必矣卒如所

料元辰字君華尚太宗蔡國公主累擢至山南東道節度使兩知河南嘗值河溢城將壞躬涉泥濘督工壅塞民有避水於林杪者既濟以舟楫又以家財賑之時數郡被水患獨元辰所部民無墊溺知定州適契丹入寇王超王繼忠領兵踰唐河戰元辰度其必敗潛發兵護河橋超等果失利敵衆至橋見陣整而遁徙知徐州以疾卒年五十贈中書令廷祚厚重寡言治家有法好儒學聚書數千卷至元辰聚書乃至數萬卷喜讀左氏春

秋尤通內典精筆札臨事慎重御下有術在藩鎮能愛
民待賓佐必盡禮奉身簡素所得祿賜均及親族國朝
以來尚主者獨稱其賢子守禮守嚴守良守讓

王仁瞻字子豐唐州人顯德中隸太祖帳下即位累加
進擢乾德二年樞密副使是年命與王全斌崔彥進伐
蜀蜀平有訟同諸將取民間子女玉帛責右衛大將軍
開寶末領三司近十年頗縱吏為姦時副使陳恕輩率
任苛察與卜遇互持本司短長仁瞻不能勝責唐州防

禦使卒

李處耘字正元上黨人在周以右職隸太祖帳下建隆元年擢宣徽北院使三年改南院兼樞密副使乾德初周保權乞師討張文表命處耘與慕容延釗赴之太祖面受處耘方畧俾圖荆南處耘次江陵百餘里外潛遣數十騎入據其城高繼冲請舉族歸朝荆湖平坐與延釗不協責澠州刺史卒年四十七處耘多機謀嘗權知揚州有善政識度詳敏論事造理頗以功名自任惟受

遇思報勇於敢為朝廷以延釗宿將乃獨罪處耘處耘亦不自辨于繼隆繼和繼明繼靖太宗明德皇后即其女也

李繼隆字霸圖以父任為供奉官嘗從官還自蜀與馬墜棧道絕澗十餘丈不傷又更戍邠州至長沙遇蠻寇手足中藥箭得良藥無恙從曹彬平江南太祖謂曰昇州平可持捷書來時內侍十數皆伺獻捷有機事悉不願行繼隆獨赴闕太祖以城未下頗怒其來繼隆奏曰

途遇大風天地冥晦城破之兆也翌日捷書至上語之
曰如汝所料矣江南偽將盧絳擁兵數萬繼隆獨諭以
威信而降征太原討幽州圍范陽繼隆皆與焉又從崔
翰戰徐河從潘美出代北皆有功雍熙初屢破繼遷之
衆曹彬北伐繼隆獲敵偽貴臣一人彬欲上其功繼隆
力止之師還諸將兵敗獨繼隆振旅成列敵不敢犯即
以繼隆知定州有敗軍數萬集城下繼隆給券俾各持
詣所隸太宗嘉其有謀端拱初為鎮州都帥以萬人敗

敵八萬逐北數十里初詔止令堅壁清野繼隆曰閫外
之事將帥得裁也中黃門杜延壽止之不能故成功太
宗召還面加獎激常受詔由旱海護靈州軍糧繼隆固
執由古原州蔚茹河路為便太宗從之乃帥師以進壁
古原州是為鎮戎軍累擢至節度使真宗即位加同平
章事景德初北敵入寇上親出征命繼隆為駕前東西
排陣使先至澶州十一月二十四日敵數十萬逼州北
城繼隆與石保吉大破之強弩斃敵將順國王撻覽追

奔數十里二十六日駕至澶州幸北門觀兵召見問勞久之其部伍嚴整二年春加賞進其階邑命下而卒年五十六贈中書令繼隆雖貴胄而能以智謀自將好學喜接儒士于昭慶避章獻太后祖諱故改名昭亮補供奉官父繼隆北征昭亮尚幼遣持詔軍中問方畧及營陣衆寡之勢還奏稱旨累擢至西上閤門使仁宗即位遷東上自是屢領邊任管軍慶厯八年除宣徽北院使加南院知定州以疾願還為景陵宮使改昭德軍節度

使卒年七十一贈中書令謚良僖昭亮為人和易喜交
權要而軍政頗嚴為殿帥有卒博於都市而撤屋椽相
擊者捕斬之其軍校連州刺史宋緒廷謝亦杖之庭下
上祀南郊而騎卒失所挾弓明日當加恩澤昭亮謂宿
衛不謹不可赦原卒配隸下軍子惟賢惟實惟實惟賁
惟贄惟賡惟賀惟貫惟賞

石熙載字凝績洛陽人周顯德中登進士第太宗初領
泰寧軍節度使辟掌書記尹開封辟推官即位累加進

擢太平興國四年正月簽書樞密院事三月改副使六月樞密使八年以疾求解機務除左僕射卒年五十五贈侍中熙載有文行立朝無顧避喜稱薦善人有長者之譽于中立字表臣年三歲喪父朝廷錄遺以為供奉官十八獻文改光祿寺丞賜五品服家富於財悉推與諸父久之除直集賢院與楊億劉筠陳越李宗諤相厚善凡校祕書更中立手者皆為善本累擢知制誥翰林學士加承旨兼龍圖學士景祐四年叅知政事明年罷

為戶部侍郎資政殿學士慶曆四年自吏部侍郎除太子少傅致仕遷少師卒年七十八贈太子太傅謚文定子居簡從簡初中立家產歲入百萬死之日不能給喪具天子聞而哀之贈白金三百兩中立疎曠少威儀善諧謔頗諳臺閣故事不及汲近名請老於家客至門者必延飲非醉不得去

楚昭輔字拱辰睢陽人初太祖建節嘗召置左右建隆初擢軍器庫使開寶六年樞密副使九年樞密使太平

興國六年以疾罷為右衛上將軍卒年六十九

李崇矩字守則上黨人在周為作坊使太祖掌禁旅數
相過從建隆初累加獎擢以澤潞功授大將軍三年除
宣徽北院使判三司乾德二年樞密使趙普作相與崇
矩分秉國政以女妻普之子厚相交結太祖不悅因門
下客以陰事告開寶五年罷除節度使改大將軍太宗
即位授嶺南都巡檢就改瓊崖儋萬四州都巡檢代還
除千牛衛上將軍卒贈太尉謚元靖崇矩寡言尚信義

嘗為晉史洪肇親吏洪肇被禍崇矩方事世宗既貴遇
洪肇之孫必優而加禮之子繼昌仕至連州刺史國史
有傳繼昌之子曰勗尚太宗第八女萬壽公主舊制尚
主者升居諸父之列真宗特於其名上益以遵字陞為
崇矩之子焉遵勗字公武初授左龍武軍將軍駙馬都
尉賜第永寧里所居堂甍花有翔鳳命工琢去主服有
虬龍文屏藏之真宗喜顧待加異嘗稱其好學累官至
鎮國軍節度使知許州卒年五十一贈中書令謚文和

遵勗喜讀書兼達釋氏性理之說居第園池聚奇花果
美石多致自數千里者其費不貲有會賢閒燕二堂東
北隅有莊曰靜淵引流水周舍下嘗師事楊億億卒制
服為營其家事在許州奏乞至具茨山莫億之墓著間
燕集二十卷外館共題七卷子端懿端愿端憲端慤

李端懿字元伯萬壽公王子也七歲授如京使積官至
鎮潼軍節度觀察留後十年不遷仁宗特授以節制御
史中丞韓絳以謂非功不當除端懿亦辭不拜知澶州

卒年四十八贈節度使其弟援例冊贈侍中端懿和厚
多讀書喜賓客所與游從皆時之賢士大夫于詢謹復
訢

弭德超嘗給事晉邸太平與國中累擢至酒坊使嘗誣
曹彬彬不辨八年擢宣徽北使兼樞密副使怒王闕

顯等居其上

話之且曰我有安社稷功汝等何人反在我上上無執
守為汝輩眩惑顯等以聞命鞠得實削奪官爵同家屬
配隸瓊州

楊守一字象先其先洛陽人唐末徙家宋鄭間初為晉
邸涓人即位累擢至翰林副使初名守素上為更其名
與趙鎔柴禹錫相里勳同告秦王廷美陰謀端拱元年
除宣徽北院使簽書樞密院事卒年六十四贈太尉
張遜遼城人駙馬都尉魏咸信同母兄也事晉邸即位

補殿直屢加進擢端拱二年除宣徽北院使簽書樞密院事淳化二年改副使又加知院事四年坐與寇準不協罷青諸衛將軍卒年五十六贈桂州觀察使

曹彬字國華真定人也父芸為成德軍兵馬使周祖貴妃張氏彬之從母也仕周至引進使建隆初遷客省使乾德二年伐蜀以內客省使監歸州路行營劉光乂軍兩川平除節度使開寶元年為宣徽南院使八年平江南九年樞密使太宗即位加同平章事太平興國八年

為弭德超所誣罷為天平軍節度使雍熙三年詔彬與
崔彥進傳潛潘美等北伐雖尅新城破關

涿州而繼有岐溝

之敗降右驍衛上將軍真宗即位復樞密使加檢校太
師平章事咸平二年薨於位年六十九贈中書令追封
濟陽郡王彬敬慎和厚在朝廷未嘗忤旨亦未嘗言人
過失平蜀還大祖詢官吏善否對曰軍政之外非臣所
聞時諸將皆欲屠城殺降彬獨任恕而戢下所至悅服

太祖降璽書褒之時諸將多有子女金帛彬橐中惟圖書衣衾而已故主帥俱貶而彬獨進擢及征江南亦緩攻取數遣開諭亦冀其降雖已城陷猶納歸款偽朝君臣賴以獲免自出師至凱旋士衆畏服無輕肆者其軍政如此雖弭德超之譖暫解機務而太宗察其忠謹待遇彌厚北征諸將以潘美獨拔三州遂違節制而失利於岐溝此愛克厥威之過也時趙昌言在魏奏乞誅彬及昌言自延安還被劾不得入見彬居樞府為請於上

彬之仁厚皆此類也周朝嘗使吳越訖事即行不受私
覲吳越屢追遺之彬曰吾終拒之是近名也遂受而歸
盡輸內帑世宗強還之欲辭不獲命悉以分親舊而一
介不取居官俸入給宗族無餘積遇人雖甚微賤莫不
以禮待遇朝士大夫必引車避之真宗聞其疾親視臨
問手為和藥及以訃聞惻然震悼對輔臣語及彬必流
涕以遺恩官其親族門下吏十餘人于璨瑋孫儀

曹璨字韜光彬之長子以蔭補供奉官累擢至忠武軍

節度使殿前都指揮使在禁衛十餘年以疾除河陽節
度使加平章事制入而卒年七十贈中書令璨質厚寡
言父為上將璨常從行彬以為類已特鍾愛之征討得
與計議太祖知之特授宮苑副使太宗朝為鎮定鈐轄
屢戰有功諸將多欲追奔璨曰戎人多變力止之璨習
韜畧好讀左氏春秋善撫士卒兼著威愛居家以孝謹
稱雖輕財不逮其父而和厚亦有父風

曹瑋字寶臣少為父彬衙內都虞候授供奉官閣門祇

金方口口口口
卷八
侯李繼遷擾邊諸將數出皆無功太宗問大臣誰可任者彬在樞密言瑋可使召見欲除諸司使知渭州彬固辭止以本官同知渭州時方十九歲咸平二年彬薨請服喪不許天禧四年除宣徽北院使鎮國軍節度留後簽書樞密院事丁謂惡其不附已指為寇準黨出之改南院使環慶路都總管兼安撫使乾興元年降左衛大將軍觀察使久之復舊官天聖七年除彰武軍節度使真定府路總管卒年五十八贈侍中謚武穆瑋好讀書

通春秋尤善左氏傳為將四十年戰未嘗敗衄威震西
鄙初自渭州移鎮戎軍言鎮戎地平便於騎戰非中國
之利請自隴山而東循古長城鑿塹以為限又請以兵
械及閒田蠲租以給弓箭手再知渭州破章詆族於武
延鹹泊川滅撥賊於平涼隴山諸族皆獻地瑋為築堡
山外號籠竿城募弓箭手守之知秦州兼涇原儀衛鎮
戎安撫使宗哥立遵與唃廝羅謀內寇乃上書求號贊
普瑋言不可聽若復有求益難制也朝廷猶授立遵節

度使既而立尊令其舅賞樣丹說蕃部郭廝敦為嚮導
瑋遂以計使廝敦圖樣丹後旬日果攜其首至瑋表廝
敦為順州刺史先是張佐知秦州蕃部驚擾至是凡前
拒王師者皆伏匿瑋令納馬贖罪而還故地至者數十
人廝敦因獻南市即秦渭之咽喉也自百關至威遠共
置寨十數亭障橋梁相望浚壕塹四百既而哨廝羅以
衆十萬入寇瑋逆於三都谷擊敗之斬獲萬級踰年又
破宗哥將馬波吃吒於野吳谷誅叛者鬼留族夷之於

是河洮蘭三州安江妙敦邈川黨通等羌皆破散宗哥
所立文法納質內屬唃廝羅逃入磧中塞垣遂安凡羌
酋欲有所為必先令其下謂之立文法焉秦人請立碑
紀瑋功有詔褒之天禧三年德明寇慶州柔遠寨都巡
檢楊承吉戰不利復命瑋為安撫使委乞骨咩大門等
族聞其至歸附者千餘落初繼遷死瑋言繼遷擅中國
要害地終身抗拒今國危子弱不即捕滅後強盛恐難
復制朝廷欲以恩致德明書寢不報自三都谷捷唃廝羅

聞瑋名即以手加額而東嚮之鎮天雄契丹使過必戒其下無敢疾驅者在渭州或戍卒叛入夏州有告者瑋必曰吾使之去勿問也繼遠聞即斬首投境上環慶邊人多市屬羌之田致單弱不自給即沒敵中瑋令盡還之有犯即徙其家於內地舊羌殺邊民以羊贖其死瑋下令曰羌自相犯從其俗即犯邊民論如律遂無犯者始置弓箭手斥塞上棄地使相角力勝者給田二頃再經秋成課市一馬馬必勝甲然後官為印之益賦田五

十畝至三百家以上團為一指揮築堡於要害處使環之以塹又立馬社一馬斃衆為市馬塞下諸塹皆以一丈五尺為深廣之阻山險不可浚者止治使峭絕而已其制屬羌百帳以上置軍主指揮使不及百帳止置指揮使其蕃落將校止於本軍序進之不從他軍以其熟虜情知出入路故也瑋所措置至今不能改子倍倚僅倩慈聖光獻皇后璪之女也璪之子曰儀

曹儀字措臣以祖蔭補右班殿直累擢至耀州觀察使

卒年五十五贈節度使子詒謁談初儀知邠州有告弓
箭手都校李文辰將叛者朝廷命儀察之文辰習知蕃
漢事邊人多畏服其後帥府以為腹心季父瑋在邠亦
所委用儀明其不反益信任之邊人莫不感悅儀嘗以
上軍都虞候為涇原副總管景祐元年皇后受冊乃請
解軍職而易廉車之任

楊礪京兆人曾祖守為唐使相乃宦者復恭之養子礪
建隆間登進士第真宗在藩邸嘗為記室即位擢給事

中翰林學士咸平元年樞密副使二年薨於位年六十
九贈兵部尚書礪周顯德中初應舉嘗夜夢見一人衣
冠甚古自稱徵君謂礪曰汝能從吾遊乎礪隨往頃之
覩宮衛嚴邃俄升大殿見一南面而坐者徵君指之曰
此來和天尊汝異日事之礪再拜而退及為記室謁襄
邸還謂其子曰今日見襄王正昔所見來和天尊也礪
為文無師法詔誥迂怪見者咤之

宋湜字持正京兆人父温故終於補闕季父温舒終於

起居郎皆有時名湜少孤以孝聞太平興國二年登進士第累擢知制誥翰林學士咸平元年樞密副使從幸澶淵以疾薨於道年五十一贈吏部侍郎湜秀穎有器識好學善談論尤工筆札得者珍藏之善引重後進有文集二十卷

錢若水字淡成又字長卿河南人十歲能屬文華山陳搏一見以為有仙風道骨雍熙中登進士第至道初同知樞密院真宗即位屢求解機務不允以親年高為請

益堅乃罷為集賢院學士改鄧州觀察使判并州以疾
召還卒年四十四贈戶部尚書若水風流儒雅有文學
善議論事母以孝聞所至有譽望接物必以誠評人貴
賤壽夭多驗自知不壽故懇辭勢位賢士大夫皆宗慕
之有文集二十卷自翰林草詔賜趙保忠云不斬繼遷
開狡兔之三穴潛歸光嗣持首鼠之兩端太宗深嘉之
知天雄軍詔遣決議城綏州率衆過河分布隊伍動有
師律宿將見者莫不歎服還言城之無益詔已之修太

宗實錄初至道三年春太宗晏駕有馴犬號呼不食詔遣送陵寢叅知政事李至欲若水書其事遺之詩曰白麟朱鴈且勿書勸君書此懲浮俗若水不從至因若水奏成書不列監修官呂端名以為若水掠美若水援唐故事有實錄不書監修官名者衆不能折嘗從幸大名詔御史中丞令訪近臣邊事若水言臣聞用兵以伐謀為上御將以用法為先比者傅潛為帥擁衆十萬閉關縱寇坐看醜敵殘虐生民不正典刑曷懲其後楊延朗

楊嗣勇於赴敵奮不顧身授任尚輕見功未賞臣願陛下誅傅潛以徇衆擢朗嗣以勸能使諸將承風各思用命聲馳塞外威懾羣敵昔僞晉劉崇結契丹入寇懦將樊愛能何徽臨敵不戰周世宗陳宴而戮之因使偏將十數分擊太原崇不敢支戎亦遁去其後收淮南下秦鳳平關南如席卷之易此用兵伐謀之効也欲消外侮必本安邊用得其人莫如太祖畀董遵誨以通遠軍郭進之在關南何繼筠之處鎮定隰州則李謙浦易州則

賀惟忠王彥昇之治原姚內斌之守慶名不過沿邊巡
檢責其効皆十餘年濶畧其細故則無畏避之心就錄
其功賞則絕倖遷之意官卑故易以使久任故知敵情
閒授審謀戒其生事是以西敵北敵十七年間遣使稱
藩不為外患已試之効今皆可行久之北敵未賓復內
出手詔詢若水備禦翦滅之術若水言臣讀前史論匈
奴者多矣若漢婁敬樊噲季布賈誼鼂錯主父偃徐樂
王恢韓安國朱買臣董仲舒之所陳特和親征伐之二

議唐李靖魏徵溫彥博郭正一狄仁傑之所及亦不過
戰守之兩端晉桑維翰不肯約之言出於微弱故相趙
普請回軍之奏姑冀息民悉非遠謀臣所不取嚴尤謂
自古禦戎無上策臣竊笑之守在四夷制勝以靜非上
策而何臣聞唐魏博一鎮爾戎兵固不衆於今日而敵
騎未嘗南牧者以幽薊為北門扼其險阻故也石晉割
地之後由定武達滄海千里受敵雖設二關鎮之以重
兵莫可以禦故晉末渡長河漢初復擾邊徼以周世宗

之英武曾未能絕其寇中山窺上黨今御札詢備禦翦滅之術臣以為未得幽州未可翦滅也後唐莊宗在河北命周德威取幽州然後南向而爭天下蓋先為萬全之計使不能勝此善用兵者也夫戰守不同心將不能料敵重兵在外輕兵在內則今之所患也臣願陛下選智謀可以任邊郡者聽召壯士以為部曲而官為廩給之又募民為招收軍厚其糧賜蠲其租稅彼供輸兩地各有親屬則敵之動息得以知之如是同心將能料敵

而在外者皆輕兵矣然無以統衆則不能用衆無以制勝則不能勝敵故必擇大臣領近鎮提重兵以專閭外之事有警則督戰已事則班師既無舉兵之名又得馭兵之要三軍同力上下一心備禦之方舉積此矣若乃患民力之困則廣邊地之營田防戍卒之驕則嚴將帥之法令古語有之曰法不可疑令不可違又曰賞不勸謂之止善罰不懲謂之縱惡昔太祖用郭進守西山遣戍卒必戒之曰汝謹奉法我猶赦汝郭進殺汝矣其假

借如此故郭進所至兵未嘗小衄臣願陛下推太祖所以待郭進之心而待諸將則法令不患不嚴勸懲不患不至上善其議

張宏字巨卿金州人太平興國二年登進士第歷官以勤幹聞雍熙三年除樞密副使四年與御史中丞趙昌言對易其任端拱初復樞密副使久之罷真宗即位授工部尚書卒贈右僕射子可久可道可度宏淳謹少廉

譽

夏侯嶠字峻極濟州人太平興國初登進士第真宗在
藩邸為翊善尹開封為推官東宮建為太子中舍即位
除給事中居數月擢樞密副使咸平元年罷為戶部侍
郎翰林侍讀學士兼祕書監卒年七十四贈兵部尚書
嶠慕道以養生為務喜誦莊老書淳謹無過有文集十
五卷

柴禹錫字玄圭大名人少有相者謂曰子甚貴若輔以
經術必至將相由是頗讀書傳太宗尹京因委質馬即

位累擢如京使掌翰林同告秦王廷美陰謀擢宣徽北
院使兼樞密副使雍熙初罷淳化四年復舊任兼知樞
密院事除節度使卒年六十二贈太子太傅

隆平集卷九

欽定四庫全書

隆平集卷十

宋 曾鞏 撰

樞密

王繼英開封人少為筆吏趙普罷相常從者去繼英奉
事愈謹普復相以補中書省官真宗在襄邸為前導即
位擢引進使未幾除宣徽南院使景德二年樞密使三
年薨年六十一贈侍中謚恭懿

王顯開封府人少給事晉邸即位補右班殿直未幾數
加進擢太平興國八年除宣徽南院使兼樞密副使淳
化二年罷為節度使咸平二年樞密使三年罷復建節
卒年七十六贈中書令子希逸太常博士直史館希範
竝遷官

韓崇訓字知禮節度使重贄之子以父任為供奉官累
擢四方館使樞密都承旨景德三年簽書樞密院事求
罷除防禦使求致仕以本官分司卒崇訓長厚謙畏未

嘗忤物

周瑩左領軍衛上將軍景之子少給事晉邨即位補殿
直累擢客省使簽書提點宣徽樞密院諸房公事與內
臣劉承珪對領其任非舊制也機要事竝令闕決樞臣
皆不敢專之咸平初擢瑩宣徽使三年兼知樞密院事
承珪同罷提點諸房是後不復置瑩五年罷除節度使
高陽關都帥屢歷藩鎮以畏懦聞卒年六十六贈侍中
謚元惠

劉昌言字禹謨泉州人淳化四年同知樞密院事至道元年罷

趙鎔淳化四年除宣徽北院使兼知樞密院事至道元年改南院使至道三年罷

李惟清至道三年同知樞密院事是年改御史中丞

王嗣宗字希阮汾州人開寶八年登進士第甲科是年初置司寇叅軍即以授嗣宗累擢至御史中丞改耀州觀察使大中祥符七年樞密副使八年求罷除大同軍

節度使知許州又改感德靜難二鎮以左屯衛上將軍
致仕卒年七十八贈侍中揚楚間有窄家神廟民有疾
不服藥而祠之并州有龍王廟郡人敬信邠州靈應公
廟傍有羣狐居之民以祈水旱疾病嗣宗為發運使知
并汾州毀二廟燻狐穴淫祀遂息嗣宗所至御下嚴峻
頗陵慢士人在朝廷力詆大臣嘗厚結王旦之弟求知
於旦旦惡其為人不答故於上前屢言中書不法事雖
無實上亦優容之平時忿宋白郭贇邢昺七十不請老

亦言於上及其晚年疾甚雖求退章一上而已猶欲得
郡而朝廷特授以環衛官致仕頗悒悒不自釋為衆所
哈

馬知節字子元父全義國史有傳全義太祖深念之知
節方七歲召見特授供奉官命樞密進三名御筆寫知
節字賜之少感慨自立未冠監彭州兵有老成風景德
三年簽書樞密院事遷副使大中祥符七年罷天禧元
年知樞密院事二年罷以疾除節度觀察留後求外任

授知貝州既而上憫其癯瘁止命歸鎮而上黨大名之
民爭求迎之卒年六十五贈侍中謚正惠知節大中祥
符四年嘗加宣徽北院使在樞府頗輕視馮拯王欽若
等賦性疎直遇事敢言不少自屈所與游皆時之賢士
居常以方畧自任初監兵潭州何承矩為守頗以文雅
飾吏治知節慕之故折節讀書雍熙間護博州兵時劉
廷讓敗於君子館知節完城繕甲儲積芻粟僚吏皆不
悅既而敵果至以有備引去李順之叛詔與王繼興同

討賊繼興惡其不附已遣知彭州付以羸兵扞賊賊十萬衆攻城知節力戰適兵至而賊潰時劉景帳下有叛卒三千知節皆戮之知秦州州嘗質羌酋支屬二十餘人踰二紀矣知節曰羌亦人豈不懷歸悉釋之羌懷其德訖終更不犯塞知益州始請以省校代鄉戶運舟自是蜀人免破產之患在延州戎寇至方上元遂張燈啟闕宴樂累夕敵不測因引去詔發澶魏六州糧輸定武時敵方內寇知節守鎮州曰糧之來資寇也止令於舟

車所至收之魯無所得而遁知節所至皆以威愛臨下而事無不濟持疾惡太過不能無怨也

周起字萬卿淄州人也母得吉夢而生起咸異之謂必大其門因名之曰起咸平二年登進士第累擢知制誥樞密直學士天禧元年同知樞密院事三年改副使與寇準善丁謂用事四年以疾罷起降太常少卿及謂貶始復祕書監禮部侍郎知潁陳汝州卒年五十八贈禮部尚書謚安惠起善真行書弟越亦以能書稱于廷荷

延讓延壽景德中詔改鼓司為登聞鼓院首以起主判
東封還羣臣多獻文章以頌德起獨上書言天下之勢
常患恬於安逸而忽於兢慎願無以告成為恃帝嘉納
焉起常患貢舉之弊因建議糊名以革之至今為著令
初置糾察司起居其職言止閱文案慮不能盡情請已
決而事枉及拷掠非理竝聽訴於本司從之權知開封
聽斷明審廷無留事以真宗判南衙聽事之所為繼照
堂自是無敢居者仁宗初降誕起方奏事真宗謂曰知

朕有喜乎起曰臣不知上曰朕始生子即入禁中懷出金錢賜起起性樂易喜飲酒在樞府常與同列飲曹瑋家多出者獨冠準與起夜漏止纔歸翌日引罪伏謝真宗笑曰天下無事大臣和樂何過之有起前後奏事及對上所問隨焚草外無知其言者家藏書至萬餘卷

曹利用字用之趙州人少慷慨有志節讀書畧通大意父諫明經及第至右補闕換崇儀使利用以父遺恩補殿前承旨轉右班殿直選廊延路走馬承受景德初駕

幸澶淵契丹來議通和利用適奏事行在樞密院選以
使敵既講好擢東上閣門使忠州刺史仍賜第一區四
年宜州軍校陳進反命利用為廣南安撫使賊平遷引
進使大中祥符七年樞密副使加宣徽北院使天禧元
年同知院二年知院事三年樞密使四年加同平章事
乾興元年加左僕射兼侍中充武寧軍節度使天聖三
年加司空五年封鄆國公明年改保平節制又明年趙
人告其從子洵逆謀遂罷以本官兼侍中判鄧州及洵

誅改上將軍知隨州又坐私貸景靈宮公用錢貶節度副使房州安置至襄州內臣楊懷敏逼使自縊以暴疾卒聞年五十九利用狃奉使之勞驟居大任遂自驕肆奏事簾前頗不祇肅多裁抑貴戚宦官而親舊或乘間獲進故不免禍既死人或以為冤子沔淵泳初樞密既以利用名聞真宗令召問以觀其志明曰王繼英奏利用言得將君命雖死不避即授閣門祇候假崇儀副使奉書以行真宗曰彼如貪歲賂亦細事爾或求闕南當

以理絕之對曰若有妄求臣不敢生還上壯其言及見戎母橫板車輓布器皿與利用共飲食果首及關南利用曰若歲求金帛以助軍費猶恐大臣議或不同割地之議死不敢聞其政事舍人高正始曰舉國而來不為關南止得金帛誠媿見國人利用曰若爾則兩國之兵未有休時矣敵度不可屈遂決通好之議而與報使韓杞同至復致書幣以往許其和好自是河朔罷兵利用與有力焉其後宰相李迪面斥丁謂姦邪利用馮拯皆

有朋黨利用曰以片文過主臣不如迪損軀入不測之敵迪不逮臣也及王曾作首相利用爭班曾為首班利用有不平之意皆其驕盈自伐故耳

姜遵字從式淄州人咸平二年登進士第累擢至諫議大夫天聖六年樞密副使八年薨於位年六十八贈吏部侍郎子延齡餘慶初遵為御史言青州大姓麻士瑤不法事詔實案誅之其為吏尚嚴而知永興軍太后詔營浮圖遵毀漢唐以來碑碣代磚甃躬督成之因獲進

用

王晦叔河南人隋王績之後名同英宗御諱故以字稱
淳化三年登進士咸平中賢良方正入等累擢龍圖閣
待制樞密直學士給事中太子賓客妻父寇準得罪落
職知汝州乾興元年貶郢州團練副使天聖四年復給
事中遷工部侍郎御史中丞兼理檢使理檢置使自晦
叔始也七年叅知政事明道元年以疾免除資政殿學
士知陝州河陽二年樞密使景祐元年加平章事薨於

位年七十二贈太保中書令謚文康子益恭益柔初玉
清昭應宮災守衛者皆繫御史獄值議修復晦叔上言
昔桓宮災桓僖親盡當毀者也漢高廟及高園便殿災
董仲舒以為高廟不當居陵旁故災玉清昭應宮非應
經義宜思災變之來上與太后悟遂薄守衛者責而罷
修宮晦叔方嚴簡重有大臣體雖通顯而儉約如貧時
知益州蜀人比之張詠有前張後王之譽有文集四十
卷周書奇訓十二卷唐書備問二卷莊列指歸四篇羣

牧故事六卷藏於家

趙稹字表微宣城人端拱二年登進士第累擢諫議大夫集賢院學士知益州坐市錦寬縱落職久之復舊俄遷樞密直學士章獻太后臨朝既久劉美有婢出入禁中稹厚結之天聖八年樞密副使明道二年罷為尚書左丞遷禮部尚書以太子少傅致仕卒年七十六贈太子太保謚僖質子士賓稹少好學嘗為益州路轉運使有平冤獄之稱

李諮字仲詢唐宗室洵之後洵貶死袁州子孫因家焉
後徙居臨江軍景德二年登進士第累擢知制誥翰林
學士權三司使請郡以樞密直學士知洪州坐三司變
茶法落職久之復舊職仍權三司使景祐二年知樞密
院事三年薨於位年五十五贈右僕射謚憲成有文集
二十卷無子以族子演為後諮幼而父出其母日夕涕
泣求母還以至絕葷茹鄉里稱其孝天聖初在三司言
天下賦入有常而用度日益願一切裁節之詔校一歲

經費減冗長者十之三又以商人入粟邊鄙算茶與犀
象為虛實三估坐耗官帑請以實錢叅紐初商人有厚
利詔革之怨謗滋起而議者是非復不一遂奪職在樞
府權茶之法寢壞乃詔諮與蔡齊更議之諮以變法嘗
獲罪固辭不許於是復用所變法而官無濫費矣知永
興恃陰犯法者悉杖之境內肅然諮性明達周知世務
處劇間暇居大任務抑僥倖號為稱職三班使臣舊七
年磨勘李迪奏減二年諮請自詔下經七年磨勘後方

用新制事雖均頗為衆怨

王博文字仲明曹州人十六善屬文應舉開封以回文詩百篇投試卷場屋中謂之王回文知廬州劉蒙叟薦召試舍人院除壽州安豐主簿又以知制誥陳堯咨薦召試中書賜進士出身累擢至龍圖閣待制進龍圖閣直學士樞密直學士龍圖閣學士兩權三司使寶元年同知樞密院事二十六日而薨年七十贈吏部侍郎子因畧疇時天禧四年詔博文按朱能王先偽乾祐天子

書事連逮者衆惟治首惡脅從者請皆得減死論其後
章獻太后怒曹利用而博文與內侍羅崇勳鞠曹內獄
於真定府內伏誅議者或謂博文致之汧邊軍民逃入
蕃部擒致者有錦袍銀帶茶綵之賞間有自歸而為蕃
部所得亦不能免法皆處斬博文遣習事者持信紙密
招之至則驗而貸其罪減誅死者甚衆詔加褒諭仍推
行其法於諸邊郡

王疇字景彝以父任將作監主簿天聖八年登進士第

累擢知制誥御史中丞翰林學士治平元年樞密副使
至二年二月共五十五日而薨年五十九謚忠簡嘉祐
末英宗疾稍愈未出疇請以時御朝又請謁祠廟會宰
執亦請上從之遂聽政焉未幾大用知制誥錢公輔言
疇資望輕淺在臺素餐上用疇而出公輔焉疇容服莊
潔坐立嶷然吏治審密文辭嚴麗任中執法屢言事亦
或見用其時多有顧望者至和初為開封府判官官者
李允良疑人毒死其叔父訴請發棺驗視疇獨曰驗而

無實是無故暴人屍此安知非允良有姦既而窮治果引伏與叔家有怨

范雍字伯純初名犯聖祖諱故改今名世居河東曾祖仁恕從孟知祥入蜀為偽相祖龜從隨孟昶歸朝為環衛官父德隆仕至供奉官葬河南因家焉咸平初登進士第天聖朝累擢至龍圖閣待制進直學士權三司使天聖六年樞密副使明道二年罷除資政殿學士改振武軍節度使知延州劉平石元孫戰陷賊降戶部侍郎

知安州歲餘復吏部侍郎遷左丞加大學士進禮部尚書卒年六十八贈太子太師謚忠憲于宗傑宗師宗賢兩河宿兵大賈轉粟塞下獲利甚厚雍為河北轉運使移它郡緡錢市糴於德棣間運以贍邊頗減橫費知永興完城浚池言者以為驚擾詔止其役雍匿詔而趣成之明年葛懷敏敗於定川邠岐間皆恐惟永興人心帖然玉清昭應宮災雍在樞密府太后曰先帝力建此宮一夕幾盡惟幸存三小殿于雍對曰先朝竭天下之力

金史四庫全書
卷十
而作之今大出非意豈非天之謹告乎如又將葺之民
不堪命矣后悟有詔勿葺雍所至治尚恕好謀鮮成惟
薦士多至公卿

張耆字元弼開封人年十一給事真宗藩邸及即位授
西頭供奉官累擢至節度使大中祥符九年除宣徽南
院使兼樞密副使天禧元年罷天聖三年自淮南節度
使加同平章事充樞密使初名旻七年改鎮山南東道
賜名曰耆明道元年進右僕射兼侍中河中尹累封至

徐國公以太子太師致仕卒年七十五贈太師兼侍中
謚榮僖有子二十三惟一忠一抱一守一如一禮一得
一繼一希一歸一昭一純一奉一正一志一平一利一
元一本一舉一誠一宗一可一女三十一人其為人有
智數真宗嘗使讀論語左氏春秋又賜以宸戒二十條
及聖政紀冊府元龜故通知傳記至於星曆術數之學
無不博習其言邊事或象緯變見多中章獻太后在壽
邸時嘗出寓其家故臨朝最所優異賜第省西七百楹

後言者以樓下瞰郊社乃毀之前後賜予不貲欲其財之不出故為曲欄積百貨與羣婢質易其有疾者親診視收其藥直御諸子嚴日一見之即出外舍所得供饋僚屬頗厚自咸平以後屢有戰功為殿帥時盛興宮室人皆爭奉符瑞丁謂王欽若等主其事無敢議者者獨毅然謂朝廷不足以承天意物論多之

張觀字思政絳州人大中祥符七年中服勤詞學科擢高第初名正觀御去正字釋褐將作監丞通判解州累

擢知制誥翰林學士權御史中丞寶元元年同知樞密院事康定元年罷為資政殿學士又除御史中丞以父高年請便郡進觀文殿學士知許州遷尚書左丞丁父憂哀毀過甚既練而卒年六十六贈吏部尚書謚文孝子仲莊仲和仲成京東路舊止通安邑鹽而瀕海禁私煮觀知鄆州兼京東西路安撫使請弛其禁歲免黥配者不可勝計其為人寬厚長者而吏事非其所長知開封府問犯夜者有見人否人皆晒之平生未嘗草書因

自為詩曰保心如止水為行見真書性至孝為祕書郎而父居業猶為幕職官請以官回授其父真宗嘉其請擢居業京官官至太府卿太宗嘗以飛白清字賜觀旌其潔白任中執法薦文彥博為御史文彥博致位宰相焉

隆平集卷十